

每週經課朗誦經文(巴克禮漢羅/教羅)2013/01/13

共同經課 - 1 以賽亞書四十三章一節~七節

1 雅各 ah，創造你 ê 耶和華，以色列 ah，hit-ê 造成你 ê，án-ni 講，你 m̄-sái 驚，因為我救贖你；我 bat 叫你 ê 名，召你；你是我 ê。2 你 tù 水中經過，我的確 kap 你相 kap tī-teh；你經過江河，水的確無淹密你；你 tù 火中行過去，的確無受燒；火燄亦無 tòh tī 你 ê 身上。3 因為我是耶和華你 ê 上帝，是以色列 ê 聖 ê，你 ê 救主；我已經 hō 埃及做你贖回 ê 價錢，hō Kó-sit kap Se-pa 做你 ê 替身。4 因為我看你做寶貝，做尊貴，koh 因為我疼你，所以我 hō 人替你，hō 列國 ê 人替你 ê 性命。5 莫得驚，因為我 kap 你相 kap tī-teh；我 beh chhoā 你 ê 後裔 tù 東方來，koh tù 西方招集你。6 我 beh 對北方講，放出來；對南方講，莫得拘留；將我 ê 眾 kiáⁿ tù 遠遠 chhoā 來，將我 ê 眾 cha-bó-kiáⁿ tù 地極 chhoā tò 來。7 見若用我 ê 名來稱 ê 是我為 tiòh 家己 ê 榮光創造 ê；是我所做成，所創造 ê。

共同經課 - 2 詩篇二十九篇

1 大衛 ê 詩。1) 大權能 ê ê kiáⁿ ah，lín tiòh 將榮光氣力歸 hō 耶和華，歸 hō 耶和華。2 Tiòh 將耶和華 ê 名所應該得 tiòh ê 榮光歸 hō 伊。用聖潔 ê 裝飾敬拜耶和華。3 耶和華 ê 聲 tī 水面；榮光 ê 上帝起雷；耶和華 tī choē-choē 水 ê 頂面。4 耶和華 ê 聲有大氣力；耶和華 ê 聲滿滿威嚴。5 耶和華 ê 聲 phah 折柏香樹；耶和華 phah 碎黎巴嫩 ê 柏香樹。6 伊亦 hō 伊 tiò 跳親像牛 á；Hō 黎巴嫩 kap Se-liân tiò 跳親像野牛 ê kiáⁿ。7 耶和華 ê 聲 hō 火燄分叉。8 耶和華 ê 聲振動曠野；耶和華振動 Ka-te-su ê 曠野。9 耶和華 ê 聲 hō 鹿母 kiaⁿ-tiòh，來生 kiáⁿ；亦 hō 樹林 ê 樹葉 lak 光光；見若 tī 殿內 ê lóng 講，榮光。10 大水氾濫 ê 時，耶和華坐 teh 做王，耶和華坐 teh 做王，直到永遠。11 耶和華 beh 賞賜氣力 hō 伊 ê 百姓；耶和華 beh 用平安賜福伊 ê 百姓。

共同經課 - 3 使徒行傳八章十四節~十七節

14 Tī 耶路撒冷 ê 使徒聽見撒馬利亞已經接納上帝 ê 道理，就差彼得約翰去 in hia。15 In 已經落去，就替 in 祈禱，hō in 受聖神；16 因為聖神 iáu-bē 臨到 in 一人；in 只有受洗禮，歸 tī 主耶穌 ê 名 nā-tiāⁿ。17 Tù án-ni，kā in 按手，in 就受聖神。

共同經課 - 4 路加福音三章十五節~十七節，二十一節~二十二節

15 百姓 teh ng 望 ê 時，眾人心內 teh 議論約翰 kiám-chhái 是基督，16 約翰應眾人講，我用水 kā lín 行洗禮；獨獨有一個比我 khah 有權能 ê beh 來，就若 tháu 伊 ê 鞋帶我也 boē 堪得；伊 beh 用聖神 kap 火 kā lín 洗。17 伊 ê 手 thèh 簸箕，beh 將伊 hit 場一盡簸，收麥入伊 ê 倉；但是麥 hiūⁿ 就用 boē hoa ê 火燒伊。21 眾百姓已經受洗禮，耶穌也已經受洗禮，祈禱 ê 時，天開，22 聖神降臨 tī 伊 ê 頂面，形狀親像鴿 á；koh tù 天有聲講，你是我疼 ê Kiáⁿ，我歡喜你。